

THILSIAMTUTE HLAWHTLINNA THURUK CHU KHAWIAH NGE?

Lalhrilliana
Functional Manager
Directorate of Commerce & Industries

Tun \uma thupui ka han thlan **Thilsiamtute hlawhtlinna thuruk chu khawiah nge?** tih hi thilsiamtute tan chuan thu pawimawh tak a ni a. Thilsiamna din thar tur tan deuh deuh a chhawr nahawm turah a ngaih theih awm e. Khawvelah hian khawi hmunah pawh thuruk a in zep ru tlat \hin a. Nupa kar thuruk a awm a, sawrkar thuruk te, khawtlang thuruk te, chhungkaw thuruk te, mimal thuruk te, chutiingin thilsiamtute pawh hian hlawhtlinna thuruk an kawl ve khiau va. Tun \umah hian thilsiamtute hlawhtlinna thuruk sawi chhuah kan tum dawn a ni. Thuruk zawng zawng kan tarlang chhuak vek seng lo ang a. Hriat pawh kan hre vek seng hek lovang. A theih chin chin kan tarlang dawn a ni.

Thupuia kan luh tak tak hmian thuhma ka han nei lawk teh ang. Superannuation avangin ka sawrkar hna thawh hun chu a lo tawp dawn hnai ta a. Kohran hruaitute pawhin an hun tawpah thuchah hnunung veladiction sermon an sawi \hin ang deuh hian puahchhuahna remchangah ka han hmang ve zaih mai ang e. Sawrkar hna hi kum 1978 a\angin Mizoram Home Guard Office-ah a nghet lovin ka thawk \an a. 1979-ah PWD hnuaiah LDC-in ka thawk zui a. 1984 a\angin Industries Department hnuaiah Extension Officer-in ka thawk a. Chu hna chu ka vuan nghet ta a. Sawrkar hna a ngheta ka thawh hun chung zat ve hawl hi NLUP buaipuitu zingah ka tel a (1985-1986,1989, 1990-1998 leh 2009-2018). Ka rilru pawh ka sen tamna ber pakhat a niin ka hria. Hna dang ka lo thawh ve tawh zawng zawng pawh hotute kaihruaina a zarah ka hlen chho ve thei \hin a, ka lawm hle a ni. Chu hna chu vuan chhoin kaisan hunte pawh neiin tun thlengin Pathian zarah ka thawk chho ta a. Hun hnunung ka lo thleng ve ta reng mai a. Ka thawh hun chung zawnga min hruaitu Pathian hnenah lawmthu ka sawi a. Ka thawhpui zawng zawngte leh hotu engemaw zat min kaihruaitute chungah pawh lawmthu ka sawi nghal e.

Aw le, kan thupui thilsiamtute hlawhtlinna thuruk chu khawiah nge tih lamah lut nghal mai ila. Thilsiamtute hi an lo thawkrimin mi hriat loh harsatna nasa tak an lo paltlang deuh vek mai. Chung harsatna an suttlang leh an hma an sutkian dan a\ang hian

mi nazawngina kan hriatpui loh tam tak thuruk an pai fer fur ngei ang. Chung mimal thuruk chu kan haichhuak seng hauh lovang le!

A hmasa berah chuan thilsiamtu hlawhtling chuan thuruk hlu tak mai tumruhna leh taimakna a nei ru khiau \hin. ‘Tum nge, ruh saruh’ tih ang ziain thilsiamtu hlawhtlingte hi an tum a ruh em em tlangpui a. An thilsiam tur an tih hlawhtlin theih nan chuan eng pawh huamin, tha leh zung zawng zawng bul \an nan an seng \hin. A theih lohna lam aiin a theih dan kawng an thlir tlat a. Harsatna an tawh avanga tawpsan ai chuan, a sutkian dan emaw pumpelh dan emaw an dap hram hram \hin. Taimakna pawh hi thilsiamtu hlawhtlinaah chuan a serh zinga a mei ang a ni bawk a. Pathian thu chuan, “Mihring sum hlu chu taimak hi a ni,” a lo ti reng a. Hei hi a taka mi a taimak chuan tih theih loh, siam theih loh, din theih loh anga ngaih hi an ti thei a, an siam theia an lo din fo tawh \hin a ni.

A dawt lehah chuan, Sum a \ul ang a hmuh theih dan tur a ngaihtuah lawk a. Sum hum sa nei lo a nih chuan sawrkar \anpuina awm thei leh sum puk turte dapin nasa takin hma a la \hin. Sawrkar laipui policy te, North Eastern Council policy kalpui lai te, State sawrkar policy ding lai te midang zawt ngawt lovin an zir a, a khawhtute ai maha chiangin an zir chhuak \hin. Sum ngai zat hriat ringawt a tawh lo tih hriain, a thilsiamna a din hnuah sawrkar emaw kawng dangah emaw \anpuina leh ham\hatna awm thei tur pawh a hre ru lawk khiau \hin. Chutianga, a sum dinhmun leh a ham\hatna hmuh tur hre ru ran chungin hma a lo \hin. Dan phal chin leh phalna lak ngai chi ang zawng zawng pawh a pe theitu lamin a lo hre lawk vek \hin. Sawrkar \anpuina tel kher lova hma la tur tan pawh ngaihtuahna sen lawk hi chu tih makmawh, thilsiam hlawhtlinna thuruk inthup a ni tih hriat a \ha.

Adang lehah chuan, thilsiam hlawhtlinna thuruk zingah chuan a hmun thlan fuh hi a ni leh awm e. USA-a mi hausa pui pui khuan an ramah thilsiamna zuk bun mai hauh lo va. China ramah te, Bangladesh leh ram tam takah an din daih a. An thilsiam chhuah chu USA-ah ngei an hralh leh \euh bawk si. Hei hian thilsiam dawn a, hmun thlan fimkhur a \ulzia a tarlang awm e. Heng ramah hian thilsiamna harsa harsaa an dinna chhan chu an dinna hmunah hian hnathawktu hlawh a hniam tlangpui a. Dan leh hrai pawh an thlah zalen bik duh viau. Sawrkarin chhiah a la tlemin bungraw thawnchhuah a samkhai a ni tlang pui bawk.

Mizoramah hian ram pawna thilsiamna din tura hmala thei kan la awm lo a ni mai thei. Mahse, kan tlin leh phak tawh ang angah uluk taka thilsiamna hmun thlan a ngai a. Hmun remchang leh \ha melh ngawt theih a ni lo va. Thingtlang chengker taka ram rem leh hmun awl zau thlan ngawt a fuh ber lovang. Chu ai chuan khawpui hnaih, kawngpui leh kawlphehtha chat-lak lova hmuh remchanna te thlan a ngai \hin. Tui mamawh chi tan pawh chutiangin tui tam tawh awmna hmun zawn pawh a ngai ang. Veng leh khua a zirin thawktu pawh an awmin an awm lo thei a. Thawktu hmuh remchanna leh taima khua emaw veng bakah rinawm khua leh veng pawh awm theih a ni. Chutih laiin, in cheina lam buaipuitu tenaute tan chuan veng lun lai leh mipui pan awlsamna hmun zawn a ngai

ve leh thung ang. Chuvangin, thilsiamtute hlawhtlinna thuruk zinga pawimawh tak hmun thlan dik hi a \ul hle a ni.

Thilsiamtute hlawhtlinna thuruk zingah hian hnathawhna khawl thlan fuh avanga hlawhtlinna hi khawvel pumah phat rual lohvin a lang chhuak tawh a. Khawl mamawh ang neih ringawt a tawk lo fo. Hmanraw changkang leh khawih awlsam thawk chak bawk si, hnuhma mawi bawk si hi thlan thiam tur a ni. Khawl lei ve tinga chhawr leh hlei thei lo sawi tur tam tak an awm tawh. Zoramah ngei pawh hian sawi tur an tam ta mai. Khawvel changkang chho zel pawh thlir thiam a ngai. Thawnthu tam ber chu Cyclostyle hmangin chhuah a lo ni \hin tawh a. Chu chu Printing Press-in a thlak a, chu pawh chu tunah chuan Offset-in a thlak leh mek tawh a. Offset pawh hi mimal printer leh sawrkar office printer \ha pui puiin a ei cher leh mek a.

A tel lova office awm theih loh hiala ngaih Typewriter chu Computer-in a luaflan zo vek tawh a. Puncture works mai mai pawh tyre thlawn nana khawl hmang lo chu an ro hle tawh bawk a. Chutiang zelin, mei chhem hluaha chhang urna pawh kawlpheha hmang khawl lian pui puiin a thlak chho zut bawk a. Chuvangin, thilsiamtute chuan uluk takin an khawl hman tur an veh lawk a. Uluk taka an zir chian hnuah an leiin an hmang \hin. Ralkhat chah ngawt ai chuan a hmuna kal chilh a, a khawl mit ngeia hmuh tluk a awm lo fo. Hetiang a nih avang hian khawl hman tur uluk taka thlana din chhuahpui theih ngei tur bun tur a ni. Khawl \henkhat chu midang hmuh mai theih loh a nih avangin, a lun em em a. A dawrtu lam tan pawh rei iak nghah ngai a awm \hin. Hei hian khawl bun fuh leh fuh lo kar hlat zia a tarlang awm e. Sawi sei lo mai ang, khawl hman a zirin thilsiamtute hi an hlawhtlingin an lo hlawhchham \hin a lo ni. Thilsiamtute hlawhtlinna thuruk dang leh chu a ni phawt mai.

A dang lehah chuan thilsiamna chuan eng emaw a siam dawn chuan a siamna tur thildang a mawmawh \hin. Chu a thil mamawh chu a hmu thei ngei dawn em tih thilsiamtute hlawhtling chuan chiang takin an lo finfiah \hin. Hmun hma buatsaih fel a, in sak zawh vek a, khawl bun rup tawh hnua thilsiamna tur hmanrua hmuh theih leh si loh chu nuai tam tak bona ram zau a ni thei tlat. Chuvangin, a thilsiam tur azira a mamawh tur chat-lak lova an hmuh theih ngei tur thilsiamtute zinga hlawhtling tawhte chuan an lo ngaihtuah lawk \hin a ni. Hei hi Thilsiamtute hlawhtlinna thuruk zinga pawimawh tak zinga pakhat chu a ni leh bawk ang.

Hralhchhuahna lam ngaihtuah fuh pawh hi thilsiamtute hlawhtlinna thuruk zinga mi a ni kan ti thei leh awm e. Economic lama mithiamte chuan thil reng reng hi a awm phawt chuan mipuiah duhna a siam mai \hin 'supply creates its own demand' tiin an lo sawi \hin a. Hei hi a dik reng a. Amaherawhchu, thilsiamtu chuan a thilsiam a zawrh thiam leh thiam lovah te, an mahni dawrtu biangbiak a thiam leh thiam loh te a pawimawh em em a. Mipuia tlang zarh thiam dan leh huhang siam thiam dante a in chen lo khawp mai. Thilsiamtu hlawhtling ho hian heng kan sawi hi an ngai pawimawh em em a. Thilsiam hralh chhuah a nih theih nan mipui hmua it awm taka pho chhuak turin sum tam tak an seng hreh lo. Media hmanga puan zar phei chu tih makmawh a ni

fo. Hei bakah hian kan signboard azirin mi rin kan hlawhin kan hlawh lo thei a. Mizo insen hrehna zawng tak a ni tlangpui. Mahse, kan thilsiamna miin an rawn hmuh phat a\anga an rilru a hmin theih nan signboard lian leh nalh tak hman hi thilsiam hralh tam leh tam loh hriltu lian tak a ni thei. Thilsiamtute hlawhtlinna thuruk zingah mipui hmaa itawm taka inpho chhuah hi tunlai khawvelah chuan a pawimawh ta khawp mai.

A tawp berah chuan thilsiamtute hlawhtlinna chu zawn zawna hmuh ngawt chi a ni lo va. A hlawhtling tam berte tawn hriat a\anga lang fo chu an tuina leh an vei ber thilsiamna din hi an hlawhtlin pui duh ber niin a lang. Chuvangin, thilsiamna hlawhtling din tur chuan mahni tuina, hriat hneh ve lam, tilthenna emaw chemkalna emaw lam hawia thilsiamtute hi an hlawhtling tlangpui \hin. Thilsiamna din mek leh din thar turte tan chuan mahni tuina leh hriat bel ve lam thlan hram ni se. Midangin chutiang chu ti ve rawh an tih ringawta inngah hi a fuh lo fo. Midang thurawn hmanga hma la tur kan nih pawhin hma lak tak tak hmaa chiang taka zir chian ni se. Hriat ngai loh ram dai ngawt pawh a pawh chuan hriat ngai loh thilsiamna din chu kawng a bo duh khawp ang. Chuvangin, kan thilsiamtu hlawhtling ni tur chuan hma kan lak hma hauhin kan hmalakna tur kha chipchiar takin kan zir ang a, kan hre chiang hle tur a ni.

Aw le, kha ti zawng kha duh tawh dawn mai ila. He article ka ziah lai hian tlai ni tla tur eng sen ruih chu ka tukverhah a rawn lut suar suar a. Ka tan sawrkar hna ka thawhna ni hi, he ni tla tur ang hian a tla suar suar ve mek bawh a. Tun hi sawrkar hna ka thawh chung a ka article hnuhnung ber ni tawh turah ka ngai bawh a. Chhiartu zawng zawng 'Adios Amigo' tiin ka thlah mai teh ang che u.

Industry Meichher
Jul-Sep, 2020